

Carta chí ivi nacahyí Pablo nuú na cúu cuéntá Jesús ñuu Tesalónica

Pablo xihín dā xíca xihín dá chindahá dā Ndióxi coo na cúu cuéntá Jesús ñuu Tesalónica

1 Yehe cúu Pablo, dā cáhyí carta yóho xihín Silvano xihín Timoteo ta chindahá i ña nuú ndihi ndó, na cúu cuéntá Jesús ndúu ñuu Tesalónica. Ta in nanduu ndó xihín Ndióxi, tátá yō ta in nanduu ndó xihín Jesucristo, xitoho í. ²Ná caja Ndióxi, tátá yō xihín Jesucristo, xitoho í cuahá ñamaní xihín ndihi ndó ta ná caja mé á ña ná coo vaha ini ndó.

Caja vií Ndióxi sahá na cája cuachi tá ná quixi tucu Jesucristo ñuyíví yóho

³Ndijáá ní quiví ndítahan nuú nde ndiquiahva nde ndixahvi nu Ndióxi sahá ndóhó, na cúu cuéntá Jesús. Ta íin sahá cája nde já jáchi nini quiví cándéé chága ini ndó Jesús ta quíhvi chága ini táhan ndó na cúu cuéntá Jesús. ⁴Sahá ña cán quéa cájii ini nde cáhan nde sahá ndo nuú java ga na cúu cuéntá Jesús ndá nacuu nu táca na jáchi cándéé ini ndó Jesús ta sáhan ndeé ini ndó tá ndóho ini ndó sahá ña cája xíxi ñayivi xihín ndo. ⁵Jánaḥa Ndióxi nu yō ña ndaa cája mé á tá cája vií a sahá yō. Ta sahá ña yóho sácú tiaḥva mé á ndohó cuḥun ndó indiví cacomí a cuéntá sahá ndó jáchi ndóho ini ndó cuéntá mé á viti.

⁶Ta ndaa cája Ndióxi tá jándoho a ini ñayivi, na cája xíxi xihín ndó viti. ⁷Ta sahá ña ndóho ini ndó ná caja mé á ña ná ndiquehe ndée ndo tá quiahva caja mé á ña ná ndiquehe ndée ri ndeḥe va mé quiví quixi tucu Jesucristo ñuyíví yóho. Ta quixi a xihín táto ndée mé á ta cuni yó a ña quixi a indiví tañu núhu ita. ⁸Quixi a jándoho a ini na co cándéé ini Ndióxi ta ni co cándúsa na tūhun vaha sahá Jesús, xitoho í, mé a cuu jácacu mí. ⁹Ta ndá na co cándéé ini Jesucristo já quéa ndoho ndivaha ini na anda ama cáa quiví ini indayá ta a cóo ga na nu Ndióxi. Ta tavá jíin Ndióxi na já ná a cúní ga na nuu á anda ama cáa quiví. Ta a cúní ga na ña náhnu cája Ndióxi xihín ndée mé á. ¹⁰Tá ná quixi tucu Jesucristo ñuyíví yóho já caja cáhnu ndivaha tóco ndihi na cúu cuéntá Jesús mé á nuú quixi a. Ta já catóntó ndivaha tóco ndihi na sahá ña náhnu ndivaha caja Jesucristo. Ta

quiahva já caja cáhnu ri ndóhó va Jesucristo mé quiví cán jáchi cándeé ini ndó tuhun vaha sahá Jesús ña nacahan nde xihín ndo.

¹¹Ña cán quéa ndijáá nít quiví xíca tahví nde nu Ndióxi saha ndo ña ná cacuu ndó ñayivi ndaa tá quiahva cúni mé á jáchi sahá ña yóho nandicaxi a ndohó. Ta xíca tahví nde nu Ndióxi saha ndo ña ná quiahva mé á ndée á nu ndo já ná cuu jáxinu coo ndó ña vaha ña cúni ndó caja ndó nani cája chúun ndó cuéntá mé á sahá ña cándeé ini ndó mé á. ¹²Ta sahá ña vaha cája ndó, caja cáhnu ñayivi Jesucristo. Anda jáví ndiñehe jícó Jesucristo ndohó jáchi cúu ndó cuéntá mé á ta cája ndó ña cúni mé á. Mé a ndaa cúni Ndióxi xihín Jesucristo, xitoho í caja cuahá ñamaní xihín yo.

Cáhan Pablo sahá da ihví Jesucristo, mé da quixi chí nuu

2 Cuni johó vaha ndó, ñani mí i, na cúu cuéntá Jesús jáchi cáxi tuhun i xihín ndo saha mé quiví quixi tucu Jesucristo ñuyíví jácata mé a mí ndique táhan í xihín á. Xíca tahví i nu ndó ²ña ná a cándúsa ndó java ñayivi tá cáchí na ña sa naxinu quiví ndicó coo Jesucristo ñuyíví. A ndícani ga ini ndó sahá ña cáchí na jáchi a juú ña ndaa cúu á. Tá ná cachi na cán ña nacahan Ndióxi xihín ná á tá ná cachi na ña nacachi mé nde ña nandindaa mé quiví cán á tá ná cachi na cán ña nacahyí nde in carta nu ná já quéa a cándúsa toho ndó na jáchi a juú ña ndaa cúu á. ³A cándúsa ndó ña cáchí na cán jáchi cúni na jándahvi na ndohó. Ta viti cáhan nde ña ndaa xihín ndo saha mé quiví quixi tucu Jesucristo. Jáchi jihna ñúhú casahá cuahá ndivaha ñayivi nduu na na ihví Ndióxi ta jándicoo na íchi cuéntá mé á. Anda jáví casaa in da quini, da cája cuahá ndivaha nuu cuachi. Joo vaxi quiví tá jándihi Ndióxi saha dá ini indayá. ⁴Ta mé da quini yóho, da cúu da ihví Ndióxi cándají da mé á ta cándají da tóco ndihi ña cúu cuéntá mé á. Anda jáví casaa da veñuhu cáhnu ndácaan ñuu Jerusalén cacao da cán tátuhun Ndióxi. Ta cachi da xihín ñayivi ña cúu dá Ndióxi.

⁵Á co ndícuhun ini ndó tá nasahiin i xihín ndo já cuití nacahan i ña yóho xihín ndo. ⁶Ta viti sa cándaa ini ndó ndíá sájí nuu nuú da ihví cán ña ná a xinu coo da mé quiví ña co ndítahan nu dá xinu da. ⁷Vatí cámani jánaha da ihví mé dá nuú ñayivi joo cája chúun jehé da viti ñúhú jándihi da sahá ñaha Ndióxi cúni da. Ta viti íin in a sájí nuu nuú da ihví ta co sahan ñamaní jánaha da ihví mé dá nuú ñayivi. Joo vaxi quiví caxoo ña sájí nuu nuú da ihví cán. ⁸Ta anda jáví jánaha da mé dá nuú ñayivi. Ta cahní Jesucristo mé da ihví cán xihín tachi yúhu a tá ná quixi a ñuyíví yóho. Ta jándihi a saha dá xihín ña ndiyihví ndaa nuú quixi a. ⁹Tá cámani quixi tucu Jesucristo ñuyíví já casaa mé da ihví xihín cuahá ndivaha ndée ña nasahan tiñáhá sacuahá nu dá. Ta jándahvi da ñayivi jáchi caja da

cuahá ñaha náhnu, ña co cúu ña ndaa. ¹⁰Ta caja da tóco ndihi nuú cuachi jáchi cúni da jándahvi da ñayivi, mé na xíca íchi cuahan indayá. Cuhun na indayá jáchi coó naxeen na candúsa na ña ndaa saha Jesucristo ta coó naxeen na quihvi ini na ña ndaa, ña cuu jácacu ñahá. ¹¹Ña cán quéa quiahva Ndióxi ñamani jándahvi da ihvi cán na já ná candúsa na ña tuhún. ¹²Já quéa jándoho Ndióxi ini tóco ndihi na cán jáchi coó nacandúsa na ña ndaa ta ndinuhu cuachi nacatóo na cája na.

Nacaxi Ndióxi ndohó ña ná jácacu a ndohó

¹³Ta ndijáá ní quivi ndítahan nuú nde ndiquiahva nde ndixahvi nu Ndióxi saha ndó, na cúu ñani nde cuéntá Jesús saha ña quihvi ini a ndohó. Jáchi janda tá cámaní cava sáhá saha ñuyivi nacaxi Ndióxi ndohó ña ná jácacu a ndohó. Jáchi nandaja vii ínimá yii mé á ínimá ndo saha ña cándéé ini ndó ña ndaa saha Jesús. ¹⁴Cúni Ndióxi ña ná cándéé ini ndó mé á ña cán quéa nachindahá a ndehe caxi tuhun nde tuhun vaha saha Jesucristo nu ndo. Nacaxi Ndióxi ndohó ña ná in nduu ndó xihin Jesucristo, xitoho í. Cáhnu ndivaha cúu mé á ta ndaja cáhnu a mí xihin á.

¹⁵Ñani mí i, na cúu cuéntá Jesús coo ndacú ini ndó xihin ña cándéé ini ndó Jesucristo. A ndíndójó ndo tiin tuun ndó ña ndaa ña najánaha nde nu ndo tá nasanduu nde xihin ndó. Ta tiin tuun ndó ña nacahyí nde nu ndó viti. ¹⁶Jesucristo, xitoho í xihin Ndióxi, tátá yo, mé a quihvi ini mí ná quiahva tuhun ndeé ini ta anda ama cáa quivi a ndíhi saha. Ta viti ndátí tiahva caja Ndióxi cuahá ñamani xihin yo. ¹⁷Ta xíca tahví nde nu Ndióxi ña ná jachutú a ínimá ndó xihin ndeé mé á. Ta ná chindeé a ndohó cahan ndó tuhun vaha ta caja ndó ña vaha cuití va.

Cúni Pablo ña ná caca tahví na nu Ndióxi saha dá

3 Candehé ndó, ñani i, na cúu cuéntá Jesús. Nu ndíhi cahan i tuhun yóho xihin ndo. Caca tahví ndo nu Ndióxi saha nde. Ta caca tahví ndo nu mé á ña ná ndicuita nuu yachi tuhun vaha saha Jesús ndijáá ñuu ta ná ndiquehe vaha ñayivi mé tuhun vaha tá quiahva nandiquehe ndó ña. ²Ta caca tahví ndó nu Ndióxi saha nde ña ná jácacu a ndehe ndahá ñayivi quini. Vatí ndúu cuahá na co cándéé ini Jesucristo ³joo jáxinu coo Ndióxi tuhun mé á. Já quéa quiahva mé á tuhun ndeé ini ndó ta candaa mé á ndohó já ná a cája tiñahá sacuahá ña núu xihin ndo. ⁴Cándéé ini nde Jesucristo ta cándéé ini nde ndohó ña cája tá cája ndó ña najánaha nde nu ndo. ⁵Ná chindeé Ndióxi ndohó candaa ini ndó ndá quiahva quihvi ini á ndohó. Ta ná chindeé a ndohó caja ndeé ini ndó tá ndóho ini ndó tá quiahva nacaja ndeé ini Jesucristo tá nandoho ini a.

Xíní ñúhú caja chúun í catacú

⁶Cuni johō vaha ndó, ñani mí i, na cúú cuéntá Jesús. Nasahnda Jesucristo chuun nu yō sahá ña cán quēa sáhndá nde chuun nu ndo ña ná caxoo ndó nuú na cúú cuéntá Jesús tá cájúsá na caja chúun na tá quiahva najánaha nde nu ndó. ⁷Ta sa xíní ndó ña ndítahan nu ndó caja ndó tá quiahva nacaja mé nde tá nasanduu nde xihín ndo jáchi coó nacajúsá nde caja chúun nde. ⁸Nachahvi nde sahá ña naxixi nde cán. Nacaja chúun vaha nde ñuú ta ndiví já ñañehé nde jiuhún catacu nde já ná a ndóho ni in ndó sahá ña naxito ndó ndehe. ⁹Vatí íin sahá nde cachi nde xihín ndo ña ná coto uun ndó ndehe joo coó nacaja nde já. Ña nacaja nde quēa nacaja chúun vaha nde já najánaha nde nu ndo ndá quiahva ndítahan nu ndó caja ndó. ¹⁰Á co ndícuhun ini ndó chuun nasahnda nde nu ndo tá nasanduu nde xihín ndo. Já nacachi nde já: Ndá na co cúni caja chúun, ná a cúxu toho na, nacachi nde. ¹¹Jáchi ñañehé nde tuhun ña ndúu java na jusá tañu ndó ta co cúni na caja chúun na ta xíca nuu na játaca na tuhun sahá ñayivi. ¹²Ta sáhndá nde chuun nuú na jan ta jácahan nde na xihín ndee nasahan Jesucristo, xitoho í nuú nde ña ná caja chúun ndísáhnua na já ná ñehe ná ña cuxu na.

¹³Candehé ndo, ñani i, na cúú cuéntá Jesús. A cánaá ndó caja ndó ña vaha. ¹⁴Tá ná canduu java na tañu ndó ta co cúni na caja na ña cáchi nde xihín carta yóho já quēa xíní ñúhú candehé vaha ndó ndá na cúú ná ta a cáca nuu ga ndó xihín ná já ná cacahan nuu ná sahá ña cája na. ¹⁵Joo a cája ndó cuéntá ña cúú ná na ihvi Jesucristo. Xíní ñúhú jácahan ndó na ña ná caja vaha na jáchi cúú ná ñani ndó, na cúú cuéntá Jesús.

Ndíndayí Pablo ñayivi Tesalónica

¹⁶Ta Jesucristo, xitoho í, mé a íin vaha ini ná quiahva mé á nu ndo ña ná coo vaha ini ndó ndaja táhan quivi. Ta ná coo vaha ini ndó xihín ndá ñaha nacuu vaxi nu ndo. Ná coo Jesucristo, xitoho í xihín ndihi ndó.

¹⁷Yehe cúú Pablo ta chindahá i Ndióxi coo ndó ta cáhyí i quiví i xihín ndáha i já ná candaa vaha ini ndó ña mé a ndaa yehe cúú da nacahyí i ña yóho nu ndo. ¹⁸Ná caja Jesucristo, xitoho í cuahá ñamaní xihín ndo. Já ná coo.